

PAWLPI MITE LEH PAWLPI HONGHILHNA THU

Pawlpi honghilh na ci-in, ki gengen himahta leh, Pawlpi honghilhna thu te koi a oma, koi ah kigelh a, kuate in gelha, koi sungah kisimthei dinghiam cih ei Kawlgam le Zogam a om Catholic Pawlpi mite atamzaw in ihthei khakei hi. Pawlpi hilhna cih kammal ihzak munmahmah hangin, Pawlpi honghilhna thu te koi ah kasimthei ding hiam, koi ah kizong thei dinghiam ci a, angaihsun kha ngeilo leh, aphawkkha ngeilo thuzuimi pen 95% bang om dingin kangaih sunhi. Tua banah Pawlpi hongmakaih Siadawpi (Bishops) te leh Siampi (priests) te sung mahmah ahzong Pawlpi honghilhna laite, zongtangtang in, asimtangtang leh akan tangtang a, tua thute thuzui te tungah ahilhik tangtang pen 5% a omloh khakding alung hihmawhhuai khat ahihi. Ei Kawlgam/Zogam Catholic thuzui mite adingin, Pawlpi honghilh nate ihsimtheih nang, mikim in eimau theih Kawlpau Zopau te tawh ihsimtheih nangin kigelhkhia zolo ahih manin zong, thuzui mite lakah Pawlpi honghilhna ci in aki gengen hangin bangtaktak hiam, bangteng honghilh hiam, banghun in bang honghilhhiam cih thu i thei khakei thei hi.

Tua hi leh Pawlpi honghilhna koi ah muthei ding i hiam ci-in i etciangin, adiakdiak in *Catechism of the Catholic Church* aki ci, ei Tedim kamin Pasian Thubu akici Laibu ah kimu thei hi. Ahi zongin tua Pasian thubu pi pen Kawlpau in kineizo pan a, eipau in abu cingin kineizo nailo hi. Tua ahih manin Kawllai simthei te adingin tua Laibu in Laisiangtho zomah aneihtaak, asimtaak leh neihding simding a, akilawm penpen laibu ahihi. Ei pau tawh hongki gelhkhia Pasian Thubu nono te pen tua Laibu pi sungpan hong kilakhia in, hong kiletkhia hi a, Pasian Thubu acing hinai lo hi. Mailam ah eipau tawh neihzawhding zong i lamen lai hi.

Anih na ah, Pawlpi honghilhna Thu te pen, tuhun adingin, Vatican II documents akici, 1962-1965 sungteng in Vatican City ah Pawlpi bup Siadaw te leh a Lianbel Siampi pa ii

Ecumenical Council pan honghilhna Laibu ah kimu thei pen hi. Tua Laibu pen Vatican II kici hi. Hih Vatican II pen ei Catholic thuzui te a dingin, akigen theilo athupi mahmah thute honghilhna ahihi. Tua te sungah : *Biakpiakna Thu* (Sacrosanctum Concilium), *Pawlpi Thu* tawhkisai (Lumen Gentium), *Laisiangtho leh Pasian Kammal* cihthu tawhkisai (Dei Verbum), *Tuhun leh Pawlpi* (Gaudium et Spes) cih te banah, Pawlpi mite leh Christian ahilo mite biakna tawh kisai in bangci kizopding, Catholic thuzui te leh Sanggam Christian te kikal ah bangci kizopding cihthu te tampi honghilh hi.

Tua banah a Lianbel Siampi te (Pope) honghilhna ahi *Papal Encyclical* cih lai te, Siadaw te leh a Lianbel Siampi pa ii ahunzui a honghilhna ahi, *Synodal Exhortation* cih te akipan Pawlpi honghilhna Lai te tampi om hi. Ahi zongin hih Pawlpi hilhna te Kawlkam/Zokam tawh kiletkhiazo nailo hi. Bang hangin kiletkhia zolo hiam ihcih ciangin: Kammal kicing ihnei lo nahangin kammal pawlkhat te letkhiat nadingah haksatna tampi om a, amanin kiletkhia thei lo phial hi. Kawlgam pan in tuate aletkhia theiding *Theologians*, *Bible Scholars* cih akipan *Liturgist*, cihte ki omzo nailo cileng ihkhial kei khading hi.

Kawlgam sunga om Siadaw te, Siampi te akipan biakna sungah Pilna sang neite in laigelh, lai at pen Pasian nasep a, a ngaihsun, tuni dongciang ki omnai lo phial hi cileng i khialkei kha dinghi. Hih in i supna lianpen ahih nathu phawkhui mahmah hi. Abeisa hun in, Kumpi lampan in laigelh a, laibu thohkhiat ding hanciamna te ah nawngkai natuamtuum om tawntung hi. Hih thu in Christian upna tawh kisai Kawllai/Zolai tawh i neihzawhnai lohna ahang lianpen khat ahihi. Tu hun ciangin ahiehle suakta takin kigelhthei ta ahiehmanin lungdamhuai hi. Biakna sungah atheizaw deuh dinga ih ngaihsut ahi, Siadaw te, Siampi te, Nungak siangtho, Tangval siangtho leh thuzuimi te sungah mipil misiam te in Pasian thutawh kisai in lai honggelh keileh Pasian thutawh kisai in eipau eikamtawh akigelhlo hidinga, Pasian hongpiak

Eipau, Eikam, Eilai pen leitungvai ding beka, azangte hiding hanga, Eilai tawh Pasion apahtawi theilo te ihsuak khading hi cihthu zong phawkhuai thu khat hongsuakta hi.

Diocese khat peuhpeuh ah Literature Commission pen athubek in om in, sazuk kipuak in kipua ciata, Pawlpi sungah laitawh nasep dinggel naleh hanciamna te ah, tha nemna lianpi omhi ci in kimu hi. Hi thu Kawlgam sung Dioceses khempeuh ah atawm atam omciat hi cih kithei hi. Banghanghiam ihcih ciangin, asemte leh vaipuak neite in nasemlo, hanciamlo cihna hilo zawin, Lai tawh nasep pen mikhat leh nih bek ii septheih hilo a, kipawlkhawm a nasep ahih manin, vaipuak neite ahuhding laigelh, lai at, kisas banah, mission nasep a (Pasion nasep) i ngaihsut ding, i neihtheih ding athupi mahmah khat ahihi.

Anunung leh athupi mahmah khat in banghiam ihcih ciangin, Pasion thutawh laibu akigelh te Kawllai ahi a, Zolai (Tedim kam) tawh ahizongin kizuakzo mahmah lo hi. Agelh te in gelh in, asimding mi omlo cileng kikhial lo kha ding hi. Tua ahih manin, laigelh te leh, laibu thohkhia dingte adingpan in, haksatna leh lauthawngna tampi om hi. Banghanghiam cihleh Laigelh a, Laibu thohte pen lungsim leh thatang bek mah azian a azangte uh hi in, adang akisam tuamtuam te ah ngaihsuh zawhloh zah dongin haksatna om hi. Athupi pen khat in, nasepkhop theihna lungsim kisampha pen hi. Commission om in, hongpan pihding om in himah ta leh, nasemkhawm theilo in, tangkia lungsim tawh na ih sepnopna lungsimin, Pawlpi thu tawhkisai, Laibu, Laitai, Labu, Laisiangtho cih a kipan nasepna khempeuh ah lawhcin na tawh hong kigamla sak semsem in, Pawlpi phattuam na zong tawmsak semsem hi.

Tua hi in, mailam hun ciangin, Pasion thutawh kisai Pawlpi honghilhna, a Lianbel siampi pa honghilhna, a kipan ahun tawh kituak a Pawlpi nuntakzia te ihneihzawh nading thuzui alianpen pan aneupen dongin Pasion piak Vaipuak kinei ahihna i phawk dennangin athak in tha i kipia hi.